

Cofnodion cyfarfod y Bwrdd a gynhaliwyd ar 24 Ionawr 2018.

Yn Bresennol:

Ann Evans, Philip Blaker, Isabel Nisbet (eitem 2 ymlaen), Angela Maguire-Lewis, Robert Lloyd Griffiths, Ellen Donovan, Rheon Tomos, Arun Midha, Alun Llwyd, Caroline Burt (eitem 2 ymlaen), Claire Morgan (ddim yn bresennol ar gyfer eitemau 10-14).

Hefyd yn y Cyfarfod:

Helen Bushell (HB), Alison Standfast (AS), Jo Richards (JR), Kate Crabtree (KC), Kerry Price (KP) – eitem 10, Kate Welsher (KW) - eitem 8, Gareth Downey (GD) - eitem 6, Patricia McCabe (arsylwr allanol), Alison Rees (AR) - Llywodraeth Cymru.

Ymddiheuriadau:

David Jones.

1. Croeso, Ymddiheuriadau, Datganiadau o Ddiddordeb, Papurau i'w Nodi

- 1.1. Croesawodd y Cadeirydd bawb i'r cyfarfod gan egluro y byddai Patricia McCabe yn ymuno â chyfarfod y Bwrdd fel arsylwr ar ôl rhoi rhywfaint o hyfforddiant llywodraethu i'r Bwrdd yn ddiweddar. Eglurodd y Cadeirydd fod hyn yn rhan o'r adolygiad o berfformiad y Bwrdd.
- 1.2. Gofynnwyd am unrhyw ddatganiadau o ddiddordeb. Cadarnhaodd Robert Lloyd Griffiths ei fod wedi'i benodi'n aelod o Fwrdd Cyngori Ysgol Fusnes Prifysgol Caerdydd. Ni chafwyd unrhyw ddatganiadau newydd nas cyhoeddwyd eisoes ar y rhestr sefydlog o ddatganiadau.
- 1.3. Gofynnodd y Cadeirydd a oedd gan yr aelodau unrhyw beth yr hoffent ei drafod yn deillio o'r papurau gwybodaeth. Rhoddwyd papur y Strategaeth TG ar yr agenda a chytunwyd i'w drafod o dan eitem 9 (rheoli risg).
- 1.4. Nodwyd yr holl bapurau gwybodaeth a oedd yn weddill (Rhagolwg y Bwrdd, Strategaeth Cymwysterau Cymru, Cynllun Strategol Gallu Corfforaethol a chofnodion y Pwyllgor Rheoleiddio ar 20 Medi 2017).

Sesiwn allanol – Cadeirydd CCEA

Croesawodd y Cadeirydd Gadeirydd CCEA i'r cyfarfod a diolchodd iddo am ei amser. Cafwyd cyflwyniad yn amlinellu taith CCEA dros y blynyddoedd diwethaf, yn enwedig mewn perthynas â'i ddull llywodraethu a datblygiad/dysg y Bwrdd. Diolchodd y Cadeirydd ac aelodau'r Bwrdd i Gadeirydd CCEA am gyflwyniad a thrafodaeth ddefnyddiol, llawn gwybodaeth.

Newidiodd trefn rhai eitemau ar yr agenda yn ystod y cyfarfod. Mae'r cofnodion yn adlewyrchu'r drefn ar yr agenda.

2. Cofnodion cyfarfod y Bwrdd a gynhaliwyd ar 25 Hydref 2017 a'r Materion sy'n Codi

- 2.1. Cadarnhawyd bod cofnodion y cyfarfod a gynhaliwyd ar 25 Hydref 2017 yn gofnod cywir o'r cyfarfod, yn amodol ar rai mân ddiwygiadau teipograffyddol a newid bach i baragraff 4.5. Byddai'r cofnodion yn cael eu cyhoeddi ar wefan Cymwysterau Cymru ar ôl eu cyfieithu.
- 2.2. Cafodd y Bwrdd y wybodaeth ddiweddaraf am y pedwar cam gweithredu yn y cofnodion, yr oeddent i gyd wedi'u cwblhau.

Materion sy'n Codi

- 2.3. Gofynnodd y Bwrdd pryd y byddai'r Bwrdd yn cael gweld y polisi Trosglwyddo Amodau i'w gymeradwyo. Cadarnhaodd PB y caiff y polisi ei ystyried gan y Pwyllgor Rheoleiddio cyn ei ddychwelyd at y Bwrdd maes o law.
- 2.4. Gofynnodd y Bwrdd pryd y byddai penderfyniad ynghylch darparu TGAU Seicoleg yn Gymraeg yn cael ei wneud. Cadarnhaodd PB fod gwybodaeth am y nifer debygol o ysgolion yng Nghymru a fyddai'n ei gynnig wedi'i rhoi i CBAC ac y byddai'n gwneud penderfyniad terfynol yn ei gylch ym mis Chwefror.
- 2.5. Nid oedd materion eraill yn codi.

Cam Gweithredu: HB i ychwanegu'r polisi Trosglwyddo Amodau at Ragolwg y Bwrdd a'r Pwyllgor Rheoleiddio.

Crynodeb o'r Argymhellion:

- i. Cymeradwyodd y Bwrdd y cofnodion gyda mân newidiadau wedi'u nodi.
- ii. Nododd y Bwrdd fod yr holl gamau gweithredu wedi'u cwblhau.

3. Y Diweddaraf gan y Cadeirydd

- 3.1. Rhoddodd y Cadeirydd (AE) y wybodaeth ddiweddaraf ganlynol i'r Bwrdd.
- 3.2. Cafodd aelodau'r Bwrdd eu hatgoffa o'r adolygiadau o berfformiad aelodau'r Bwrdd oedd ar ddod a rhaglen hyfforddi'r Bwrdd a drefnwyd ar gyfer mis Chwefror a mis Mawrth.
- 3.3. Cafodd adroddiad blynyddol Cymwysterau Cymru ei ystyried gan Bwyllgor Plant, Pobl Ifanc ac Addysg y Cynulliad Cenedlaethol ar 6 Rhagfyr. Roedd PB ac AE wedi bod yn bresennol. Canolbwyntiwyd ar adnoddau i gefnogi cymwysterau cyfrwng Cymraeg a chadarnhaodd PB y byddai rhywfaint o ymchwil yn cael ei gwneud er mwyn penderfynu beth yw ystyr adnoddau 'digonol' fel sy'n ofynnol drwy'r Amodau Cydnabod Safonol. Hefyd nododd PB fod Ofqual yn gwneud gwaith tebyg. Eglurodd y byddai'r gwaith yn helpu i lywio ein dull o ymdrin â'r cwricwlwm

newydd o ran adnoddau. Nododd y Bwrdd fod y sesiwn graffu wedi mynd yn dda a llongyfarchodd AE a PB am gyflwyno'r adroddiad.

- 3.4. Nododd AE fod cais wedi'i wneud am gyfarfod gydag Eluned Morgan AC, Gweinidog newydd y Gymraeg a Dysgu Gydol Oes. Hefyd gofynnwyd am gyfarfod gyda Ken Skates AC, Ysgrifennydd y Cabinet dros yr Economi a Thrafnidiaeth.
- 3.5. Roedd AE a PB wedi cyfarfod ddwywaith ag Ysgrifennydd y Cabinet dros Addysg (6 Rhagfyr 2017 ac 17 Ionawr 2018) ynghylch adnoddau ar gyfer cymwysterau diwygiedig a'n hadolygiad o Fagloriaeth Cymru. Bu'r ddau gyfarfod yn gadarnhaol.
- 3.6. Roedd AE a PB wedi mynd i ddigwyddiad lansio Llywodraeth Cymru ar gyfer Addysg yng Nghymru: Cenhadaeth ein Cenedl, a ddosbarthwyd yn electronig ymhlith y Bwrdd.
- 3.7. Nodwyd y byddai cyfnod Alun Llwyd fel aelod o'r Bwrdd yn dod i ben ym mis Mawrth 2018. Cafodd Alun ei benodi am gyfnod o 18 mis o fis Medi 2016 ac oherwydd iddo gael ei gyd-ethol i'r Bwrdd gan y Gweinidog yn hytrach na thrwy benodiad cyhoeddus ni ellid ymestyn ei benodiad drwy ei ailbenodi. Cadarnhaodd y Cadeirydd mai cyfarfod mis Mawrth 2018 fyddai cyfarfod Bwrdd olaf Alun.

Crynodeb o'r Argymhellion:

- i. Cafodd newyddion diweddaraf y Cadeirydd ei nodi gan y Bwrdd.

4. Adroddiad y Prif Swyddog Gweithredol

- 4.1. Cyflwynodd Philip Blaker (PB) ei adroddiad Prif Swyddog Gweithredol gan nodi iddo ganolbwyntio ar feysydd nas trafodwyd rywle arall ar yr agenda. Cafodd y prif bwyntiau eu crynhoi fel a ganlyn:
- 4.2. **Prosiect Iechyd a Gofal Cymdeithasol** – nododd PB fod y prosiect yn un dynamig a'i fod yn datblygu drwy'r amser. Cydnabu PB fod cydberthnasau â'r prif randdeiliaid yn hollbwysig a nododd ei fod ar fin cyfarfod â Phrif Swyddog Gweithredol Gofal Cymdeithasol Cymru. Trafododd y Bwrdd y prosiect yn fanylach ac ystyriwyd rhai syniadau o ran rheoli rhanddeiliaid a rheoli newid. Cadarnhaodd KC fod proses gaffael a rennir i benodi cwmni cysylltiadau cyhoeddus ar waith mewn partneriaeth â rhanddeiliaid eraill. Gofynnodd y Bwrdd a gafodd rhai o'r heriau presennol eu darogan. Cadarnhaodd KC fod llawer wedi'u darogan, ond nid pob un.
- 4.3. **Prosiect Casglu Data** – cadarnhaodd PB fod Cymwysterau Cymru wedi dechrau casglu data ar gymwysterau cyffredinol a bod y cyhoeddiad ystadegol cyntaf wedi'i gyhoeddi ym mis Tachwedd 2017. Bydd Ofqual yn parhau i gasglu data ar gymwysterau galwedigaethol ar ein rhan nes ein bod yn barod i wneud hynny ein hunain. Roedd yr ymgynghoriad ar gyfer templedi casglu cymwysterau cyffredinol wedi gorffen ac, ar ôl adolygu'r ymatebion, penderfynwyd dilyn templedi Ofqual a chasglu data heb eu cyfuno. Roedd hyn yn groes i'n dewis opsiwn yn yr

ymgyngoriad ond adlewyrchai ddymuniad y rhan fwyaf o gyrff dyfarnu, sef ein bod yn lleihau'r baich rheoleiddiol drwy ddilyn gofynion Ofqual, yr oedd y rhan fwyaf o gyrff dyfarnu eisoes wedi datblygu eu systemau ar eu cyfer. Nododd PB y câi hyn ei adolygu pan fyddai'r diwygiadau i gymwysterau cyffredinol wedi'u cyflwyno'n llawn ac y byddai'r rhan helaeth o ddata yn cael ei darparu gan CBAC yn unig.

- 4.4. **Gwefan** – cadarnhaodd PB fod y gwefan wedi'i hailddylunio a'i phrofi gyda chyrrff dyfarnu a rhanddeiliaid eraill. Byddai'r fersiwn newydd yn mynd yn fyw yn yr ychydig ddiwrnodau nesaf.
- 4.5. **Staffio** – diolchodd PB i RLG am ei gymorth gyda'r ymarfer recriwtio diweddar am Gyfarwyddwr Cyswllt – Cyfathrebu a Chydberthnasau â Rhanddeiliaid. Penodwyd unigolyn a fyddai'n cychwyn ar ddechrau mis Ebrill. Hefyd nododd PB y gwelwyd peth trosiant staff lefel isel dros y misoedd diwethaf yn ôl y disgwyl a chadarnhaodd fod seibiant gyrfa wedi'i gymeradwyo. Nododd PB fod recriwtio yn gofyn am lawer o waith ac yn cael effaith ar y gyllideb pan fo swyddi gwag yn codi.
- 4.6. **Fforwm Cyrff Dyfarnu** – cynhaliwyd yr ail fforwm blynyddol ym mis Rhagfyr 2017. Er gwaethaf y tywydd gwael roedd llawer o gyrff dyfarnu yn bresennol, a chafwyd adborth cadarnhaol.
- 4.7. **Prif Weithredwr CBAC** – cadarnhaodd PB fod Roderick Gillespie wedi'i benodi ac y byddai'n dechrau yn y rôl ym mis Mehefin. Bydd Gareth Pierce yn ymddeol ddiwedd mis Mai. Hysbysodd PB y Bwrdd y byddwn yn gweithio gyda CBAC er mwyn deall sut y caiff y rôl ei throsglwyddo a sut y gallwn gefnogi hynny.
- 4.8. Nododd aelod o'r Bwrdd fod Pwyllgor Cyfrifon Cyhoeddus Lloegr wedi ystyried prentisiaethau yn ddiweddar ac y bu rhai pryderon am ansawdd, yn enwedig o ran asesiadau terfynol. Nododd PB mai'r brif risg i Gymru oedd tynnu cymwysterau yn ôl a oedd yn cael eu disodli gan asesiadau terfynol. Roedd hyn yn cael ei fonitro'n agos.

Crynodeb o'r Argymhellion:

- i. Nodi adroddiad y Prif Swyddog Gweithredol – WEDI'I NODI

5. Cyfres Arholiadau'r Gaeaf

- 5.1. Cyflwynodd Jo Richards (JR) y papur ar gyfres arholiadau gaeaf 2017 a chynllun monitro cymwysterau cyffredinol haf 2018. Cadarnhaodd fod canlyniadau cyfres mis Tachwedd wedi'u cyhoeddi ar 11 Ionawr 2018 yn ôl y bwriad. Y diwrnod canlyniadau nesaf fydd 7 Mawrth 2018 ar gyfer cyfres mis Ionawr.
- 5.2. Cadarnhaodd JR fod gwaith yn mynd rhagddo i gynllunio ar gyfer cyfres yr haf a nodi unrhyw risgiau posibl.

- 5.3. Hysbysodd JR y Bwrdd fod pryderon wedi'u codi gyda Cymwysterau Cymru am yr amser addysgu / lle ar y cwricwlwm sy'n ofynnol ar gyfer TGAU Daearyddiaeth a'n bod yn ymchwilio i'r mater.
- 5.4. Hefyd nododd JR bryder yng Nghymru o ran y nifer uchel o arholwyr a oedd yn ymddeol o addysgu a'r ffaith bod nifer isel o arholwyr cyfrwng Cymraeg ar gael.
- 5.5. Trafododd y Bwrdd gynllun monitro cyfres yr haf a holodd a oedd y sefydliad yn fodlon ar y dull monitro a'r adnoddau oedd ar gael. Nododd PB ei bod yn fuddiol cael un corff dyfarnu ar gyfer y rhan fwyaf o gymwysterau cyffredinol gan fod hyn wedi ein galluogi i ganolbwyntio ein hadnoddau a pheidio â'u lledaenu'n rhy denau.
- 5.6. Cadarnhaodd Cadeirydd y Pwyllgor Rheoleiddio fod y cynllun monitro wedi'i ystyried yn fanwl yn ystod cyfarfodydd y pwyllgor a chadarnhawyd ei fod yn briodol ym marn y pwyllgor.
- 5.7. Diolchodd y Bwrdd i JR a'i thîm am y gwaith sylweddol a wnaed.

Crynodeb o'r Argymhellion:

- i) Nododd y Bwrdd y wybodaeth ddiweddaraf a roddwyd am gyfres arholiadau gaeaf 2017 a chynllun monitro cymwysterau cyffredinol ar gyfer cyfres arholiadau haf 2018.

6. Sesiwn Wybodaeth Cymwysterau Galwedigaethol

- 6.1. Cyflwynodd y Cadeirydd yr eitem, gan nodi bod y Bwrdd wedi gofyn am sesiwn wybodaeth ar gymwysterau galwedigaethol. Cynlluniwyd y sesiwn hon er mwyn rhannu gwybodaeth yn ogystal â chasglu adborth gan aelodau'r Bwrdd er mwyn llywio cynnwys sesiynau yn y dyfodol.
- 6.2. Rhoddodd Kate Crabtree (KC) a Gareth Downey (GD) gyflwyniad a oedd yn cynnwys trosolwg o'r dirwedd cymwysterau galwedigaethol yng Nghymru, ac amlinellwyd rhai o'r prif heriau polisi dros y tair i bum mlynedd nesaf sy'n debygol o effeithio ar gymwysterau galwedigaethol yng Nghymru.
- 6.3. Croesawodd y Bwrdd y sesiwn ac yn dilyn trafodaeth cadarnhaodd y byddai sesiwn bellach yn ddefnyddiol er mwyn cynnwys gwybodaeth fanylach am:
 - y risgiau i Gymru yn sgil cyflwyno lefelau T;
 - dealltwriaeth o safbwynt Llywodraeth Cymru ynghylch lefelau T a phrentisiaethau;
 - strategaeth Economaidd Llywodraeth Cymru a'r strategaeth Cyflogadwyedd sydd ar droed;
 - goblygiadau o ran adnoddau i'r sefydliad / goblygiadau i'r strategaeth cymwysterau galwedigaethol;

- ein gwaith gyda Llywodraeth Cymru mewn perthynas â chymwysterau galwedigaethol yn gyffredinol.

6.4. Diolchodd y Bwrdd i KC a GD am y sesiwn werthfawr.

Crynodeb o'r Argymhellion:

- Nododd y Bwrdd y wybodaeth a rannwyd a chytunodd y dylai sesiynau yn y dyfodol gwmpasu'r eitemau a restrir ym mhwyntiau 6.3 uchod.

7. Y Wybodaeth Ddiweddaraf am y Cwricwlwm

- 7.1. Cyflwynodd y Cadeirydd yr eitem gan nodi bod y Bwrdd wedi gofyn am y wybodaeth ddiweddaraf am y Cwricwlwm newydd i Gymru a chyfraniad y sefydliad ato hyd yn hyn.
- 7.2. Cyflwynodd KC y sesiwn gan grynhoi Dyfodol Llwyddiannus, pedwar diben y cwricwlwm newydd, y meysydd dysgu a phrofiad, y cynnydd hyd yn hyn a'r amserlenni presennol.
- 7.3. Trafododd y Bwrdd, mewn peth manylder, gynnwys y sesiwn a dadleuodd wahanol agweddau gan gynnwys rôl y sefydliad yn cefnogi, yn cynghori ac yn y pen draw yn datblygu cymwysterau.
- 7.4. Nododd PB i sawl cwestiwn am bolisi addysg gael eu codi gyda Llywodraeth Cymru, ac y bydd yr atebion iddynt yn helpu'r sefydliad i benderfynu sut i fynd ati i ddatblygu cynigion ar gyfer diwygio cymwysterau myfyrwyr 16 oed.
- 7.5. Nododd PB y bydd angen adnoddau ychwanegol er mwyn sicrhau y gall y sefydliad fynd ati i gyflwyno'r diwygiadau yn ôl amserlen Llywodraeth Cymru. Roedd PB wedi codi hyn gyda Llywodraeth Cymru a oedd wedi ymateb yn gadarnhaol.
- 7.6. Daeth y Bwrdd i'r casgliad fod sawl elfen anhysbys ar hyn o bryd, a gaiff eu deall yn well gydag amser. Cadarnhaodd y Bwrdd y dylai Cymwysterau Cymru gefnogi'r gwaith o ddatblygu'r cwricwlwm newydd, gan fod yn glir ynghylch ein rôl a'n cyfrifoldebau.
- 7.7. Diolchodd y Bwrdd i KC am ei hymdrechion yn datblygu ac yn cyflwyno'r sesiwn a gofynnwyd i HB ychwanegu'r wybodaeth ddiweddaraf am y Cwricwlwm i Gymru at bob agenda Bwrdd am y tro.

Cam Gweithredu: HB i gynnwys y wybodaeth ddiweddaraf am y Cwricwlwm i Gymru ar agenda pob cyfarfod Bwrdd am y tro.

Crynodeb o'r Argymhellion:

- ii. Nododd y Bwrdd gynnwys y cyflwyniad a'r drafodaeth a gafwyd wedyn (fel y crynhoir uchod).

8. Arolwg Pobl 2017

- 8.1. Ymunodd Kate Welsher (KW) â'r cyfarfod a chyflwynodd ganlyniadau'r ail arolwg staff. Nododd y Bwrdd i lefelau ymgysylltu â staff gael eu cynnal ac roedd yn falch o nodi bod mwy o sgoriau cadarnhaol mewn meysydd lle bu'r rheolwyr yn canolbwyntio gweithgareddau dros y flwyddyn ddiwethaf.
- 8.2. Gofynnodd aelodau'r Bwrdd a oedd y sgoriau negyddol yn debygol o fod yn nifer fach o unigolion a oedd yn gyson negyddol neu wahanol aelodau o staff a oedd â phryderon gwahanol. Eglurodd KW nad oedd rheolwyr yn gweld arolygon unigol ac nad oedd sylwadau yn cael eu priodoli i neb, ond roedd yn bosibl nodi themâu y oedd mwy nag un aelod o staff wedi cyfeirio atynt. Cafodd y rhain eu trafod ymhellach yn Niwrnod Datblygu staff.
- 8.3. Nododd aelodau'r Bwrdd fod cwestiynau mewn rhai penawdau yn cael eu gwrthdweud mewn eraill ac awgrymwyd y dylai'r rheolwyr ystyried themâu mewn adrannau gwahanol.
- 8.4. Ar y cyfan, teimlai'r Bwrdd ei fod yn ganlyniad da ac roedd yn falch o weld bod sawl cam gweithredu a gymerwyd y llynedd wedi bod yn effeithiol.

Crynodeb o'r Argymhellion:

- i. Nododd y Bwrdd ganlyniadau Arolwg Pobl 2017 a'r dadansoddiad a luniwyd, a chydabu fwriad y sefydliad i ymateb a gweithredu ar yr arolwg yn ystod 2018.

9. Rheoli Risg

- 9.1. Cyflwynodd HB yr adroddiad gan amlinellu'r gofrestr risg sefydliadol bresennol a nodi'r risgiau hynny lle bu cynnydd yn y sgôr weddilliol, y rheini a gafodd eu cau a'r rheini a gafodd eu diweddarau. Trafododd y Bwrdd yr adroddiad a nododd y newidiadau gan ofyn am ystyried p'un a gafodd FCS17 (yn ymwneud â rheolaethau diogelu gwybodaeth a sicrwydd trydydd parti) ei sgorio'n briodol o ystyried y newidiadau arfaethedig i'r seilwaith TG. Eglurodd AS mai'r bwriad oedd dileu seilwaith a gyflwynwyd wrth osod systemau TG cychwynnol, ond nas defnyddiwyd erioed ac nad oedd ei angen - felly nid oedd risg uwch yn gysylltiedig â hyn.

- 9.2. Cadarnhaodd Cadeirydd y Pwyllgor Archwilio a Sicrhau Risg fod cofrestr risg y sefydliad wedi'i hystyried yng nghyfarfod diwethaf y Pwyllgor a bod y Pwyllgor yn fodlon arni.

Crynodeb o'r Argymhellion:

- i. Nododd y Bwrdd gofrestr risg ddiweddaraf y sefydliad a'r adroddiad risg lefel Bwrdd ategol.

Papur gwybodaeth – Strategaeth TG

- i. Cafwyd cais gan y Bwrdd i'r papur gael ei gynnwys ar yr agenda. Canmolodd aelodau'r Bwrdd y strategaeth a nododd ei bod yn ddogfen hawdd ei darllen, yn enwedig o ystyried natur y cynnwys.
- ii. Cafodd yr ymholiad yr hoffai'r Bwrdd ei godi uwchlaw'r llinell ei drafod ym mharagraff 9.1.

10. Adroddiad ar y Cynllun Gweithredol (Ch3) a'r Adroddiad Ariannol (Ch3) gan gynnwys rhagolwg diwedd y flwyddyn

Ymunodd Kerry Price (KP) â'r cyfarfod.

Adroddiad ar y Cynllun Gweithredol (Chwarter tri)

- 10.1. Cyflwynodd HB yr adroddiad gan grynhai hynt y blaenoriaethau gweithredol tan ddiwedd mis Rhagfyr 2017 (chwarter 3). Nododd HB ei fod ar y trywydd iawn ar y cyfan. Cafodd cynnydd ar y brif lefel ym mhob un o'r pum Blaenoriaeth Weithredol ei raddio'n wyrdd ddiwedd mis Rhagfyr.
- 10.2. Cafwyd rhai newidiadau i'r cynllun gwreiddiol a gymeradwywyd gan y Bwrdd Rheoli, a chafodd y rhain eu cyflwyno i'r Bwrdd fel a ganlyn:
- Bydd cymwysterau galwedigaethol monitro diogelwch bwyd yn dechrau yn 2017/18, ond ni chânt eu cwblhau tan 2018/19;
 - Caiff yr adolygiad o'r sector Peirianeg a Gweithgynhyrchu Uwch ei ohirio tan yn ddiweddarach yn 2018/19 a bydd yn rhan o gynllun y flwyddyn nesaf.
- 10.3. Trafododd y Bwrdd y newidiadau gan nodi iddynt gael eu cyflwyno i'r Bwrdd fel newid posibl yn ystod cyfarfodydd cynharach. Hefyd nododd y Bwrdd fod tair swydd newydd wedi'u llenwi / wrthi'n cael eu llenwi er mwyn ychwanegu rhywfaint o gapasiti at y strwythur, ac y byddai un ohonynt yn cefnogi'r tîm cymwysterau galwedigaethol.
- 10.4. Roedd y Bwrdd yn fodlon ar hynt y blaenoriaethau sefydliadol a nododd y newidiadau ym mharagraff 10.8.

Crynodeb o'r Argymhellion:

- i. Adolygodd a nododd y Bwrdd yr adroddiad ar gynnydd ar gyfer chwarter tri, gan gadarnhau ei fod yn fodlon ar y newidiadau y cytunwyd arnynt i is-flaenoriaethau monitro diogelwch bwyd ac adolygiadau sector cymwysterau galwedigaethol.

Adroddiad cyllid (Chwarter tri)

- 10.5. Cyflwynodd KP y papur, a roddodd y rhagolwg alldro diweddaraf yn seiliedig ar y wybodaeth ariannol ddiweddaraf tan ddiwedd mis Rhagfyr 2017. Nododd i'r sefyllfa bresennol heddiw, dair wythnos ar ôl dyddiad yr adroddiad, newid ychydig ac y byddai'n parhau'n hylif tan ddiwedd y flwyddyn.
- 10.6. Yn yr adroddiad diwethaf ym mis Hydref, roedd y sefydliad yn darogan gwariant o £7.95m, a oedd yn cynnwys darpariaethau oedd yn creu cyfanswm o tua £500k ar gyfer eitemau 'llai sicr'. Roedd eitemau llai sicr yn cynnwys meysydd fel grantiau, ymchwil a chostau cyfreithiol lle na fyddai modd cyflawni gwariant tan yn ddiweddarach yn y flwyddyn oherwydd natur y gwaith dan sylw.
- 10.7. Cafodd Llywodraeth Cymru wybod ddechrau mis Rhagfyr fod yr amrywiad yn debygol o fod rhwng £350k a £400k, gyda'r cafeat fod y rhagolwg yn cynnwys rhai darpariaethau ar gyfer eitemau 'llai sicr'. Cafodd aelodau'r Bwrdd gadarnhad o hyn ar 20 Rhagfyr 2017 drwy e-bost ac ar 31 Rhagfyr roedd y sefyllfa'r un peth. Cadarnhaodd KP a PB fod trafodaethau'n parhau â Llywodraeth Cymru.
- 10.8. Nodwyd mai'r alldro presennol a ragamcanwyd oedd £7.6m, a fyddai'n arwain at danwariant o £400k (amrywiad o 5% yn erbyn y gyllideb). Yn y rhagolwg roedd darpariaethau ar gyfer gwariant ansicr a oedd yn creu cyfanswm o £317k a oedd wrthi'n cael eu cadarnhau o hyd. Nododd KP ei bod yn anochel y byddai'r rhagolwg alldro yn newid am na fyddai rhai o'r eitemau ansicr hyn yn cael eu gwireddu.
- 10.9. Trafododd y Bwrdd y sefyllfa o ran alldro, y rhesymau dros y newid a'r risgiau cysylltiedig. Nododd y Bwrdd, er bod rhagolwg 2017-18 yn cyflwyno tanwariant, na ddisgwylir gweld yr un peth yn 2018-19. Mae cyllideb 2018-19 wrthi'n cael ei llunio'n derfynol yn barod i'r Bwrdd ei hystyried ym mis Mawrth. Nododd fersiynau cychwynnol nifer o geisiadau twf newydd a oedd, gyda'i gilydd, yn fwy na'r cyllid sydd ar gael. Myfyriodd KP ar y gwersi a ddysgwyd mewn perthynas â phennu'r gyllideb a chafodd y Bwrdd dawelwch meddwl yn sgil hyn. Nododd y Bwrdd hefyd fod mwy o hanes a lefel data bellach ar gael er mwyn helpu i gynllunio a phennu cyllidebau.
- 10.10. Gofynnodd y Bwrdd a oedd angen i ddeiliaid cyllideb gael hyfforddiant er mwyn sicrhau bod gwaith cynllunio, proffilio a rheoli cyllideb mor gywir ac effeithiol â phosibl. Cadarnhaodd KP fod rhywfaint o hyn wedi'i gyflawni a bod gwaith monitro misol a chwarterol wedi gwella er mwyn cefnogi deiliaid cyllideb.

- 10.11. Nododd PB fod a wnelo'r brif wers â'r blaenoriaethau gweithredol a sicrhau bod y gweithgareddau sydd wedi'u cynllunio yn realistig ac yn gyson â'r broses cynllunio ariannol. Roedd yn hyderus bod hyn wedi parhau i aeddfedu ac y byddai'n gwella ymhellach yn 2018/19.
- 10.12. Holodd y Bwrdd p'un a wnaed unrhyw ddarpariaeth yn 2018/19 i gefnogi cost diwygio cymwysterau yn gysylltiedig â datblygu'r cwricwlwm. Cadarnhaodd KP fod peth darpariaeth, ond y gallai fod angen arian ychwanegol gan Lywodraeth Cymru. Bydd trafodaethau'n parhau â Llywodraeth Cymru er mwyn sicrhau ei bod yn ymwybodol o'r gofynion ariannol. Anogodd y Bwrdd PB a chydweithwyr i barhau i fynd ati i gynllunio a thrafod opsiynau cyllid gyda Llywodraeth Cymru – gan gydnabod bod recriwtio staff ychwanegol yn cymryd amser.
- 10.13. Nododd y Bwrdd fod y sefydliad o dan rywfaint o bwysau o ran capasiti ac anogodd PB i ystyried meithrin capasiti lle bo modd a'i fod yn briodol gwneud hynny.
- 10.14. Diolchodd y Bwrdd i KP am yr eglurder a roddwyd yn yr adroddiad a chadarnhaodd ei fod yn nodi'r rhagolwg alldro a'r trefniadau oedd ar waith i reoli'r risgiau parhaus.

Crynodeb o'r Argymhellion:

- ii. Nododd y Bwrdd y rhagolwg alldro a'r trefniadau oedd ar waith i reoli'r risgiau parhaus.

11 Adroddiad y Pwyllgor Rheoleiddio

- 11.1 Rhoddodd Cadeirydd y Pwyllgor y wybodaeth ddiweddaraf am y prif feysydd busnes o gyfarfod diwethaf y Pwyllgor ar 14 Rhagfyr. Nid oedd y cofnodion ar gael eto am fod cyfarfod y Pwyllgor a chyfarfod y Bwrdd mor agos i'w gilydd. Roedd cofnodion 20 Medi 2017 wedi'u cynnwys ym mhecyn y Bwrdd er gwybodaeth. Roedd y prif eitemau a drafodwyd yn y Pwyllgor ar 14 Rhagfyr yn ymwneud â'r gyfres arholiadau a'r cynllun cychwynnol ar gyfer ymchwilio i ffioedd a gwasanaethau cyrff dyfarnu cymwysterau galwedigaethol yng Nghymru. Hefyd cafodd y Pwyllgor gyflwyniad gan y Tîm Cefnogi Canolfannau a ganmolwyd am ei arbenigedd a'r gwasanaeth y mae'r tîm yn ei ddarparu i ganolfannau. Roedd y Pwyllgor hefyd wedi cynnal ei archwiliad o drefniadau llywodraethu.

Crynodeb o'r Argymhellion:

- i. Gofynnwyd i'r Bwrdd nodi adroddiad y Pwyllgor fel y'i cyflwynwyd gan Gadeirydd y Pwyllgor – WEDI'I NODI

12 Penderfyniadau a wnaed y tu allan i'r Pwyllgor

- 12.1 Nid oedd unrhyw eitemau i'w nodi a gafodd eu rheoli y tu allan i'r pwyllgor.

13 Calendr y Bwrdd

- 13.1 Cadarnhaodd HB y calendr cyfarfodydd sydd ar waith hyd at fis Gorffennaf 2018 a nodwyd ar yr agenda. Mae cyfarfodydd pellach yn cael eu trefnu tan fis Gorffennaf 2019. Byddai'r cyfarfod nesaf yn cael ei gynnal ar 22 Mawrth 2018.

14 Unrhyw Fater Arall

- 14.1 Gofynnodd y Cadeirydd a oedd unrhyw fater arall. Codwyd yr eitemau canlynol:
- 14.2 *Rheoliadau Diogelu Data Cyffredinol* – Holodd y Bwrdd sut roedd gwaith i gydymffurfio â'r Rheoliadau Diogelu Data Cyffredinol newydd yn mynd rhagddo. Cadarnhaodd HB fod hyn ar y trywydd iawn ac y byddai adroddiad yn cael ei gyflwyno i ARAC ym mis Chwefror ac yna'r Bwrdd ym mis Mawrth. Hefyd cynlluniwyd adolygiad archwilio allanol o gynnydd ar gyfer mis Mawrth 2018.
- 14.3 *Recrwtio aelodau o'r Bwrdd* – Holodd y Bwrdd a fyddai rhywun yn cymryd lle Alun Llwyd fel aelod ar ôl iddo adael ym mis Mawrth. Cadarnhaodd y Cadeirydd ei bod yn debygol y byddai rhywun arall yn cael ei benodi, ond y byddai hyn yn cael ei ystyried ynghyd â'r argymhellion ailbenodi a fyddai'n cael eu gwneud yn dilyn yr adolygiadau o berfformiad y Bwrdd.
- 14.4 *Ymateb i'r ymgynghoriad (Lefelau T)* – nododd y Cadeirydd fod yr Adran Addysg yn Lloegr wrthi'n cynnal ymgynghoriad ar Lefelau T ac y byddai'r sefydliad yn ymateb iddo. Oherwydd yr amserlenni, gofynnodd y Cadeirydd am i'r gwaith o gymeradwyo'r ymateb i'r ymgynghoriad gael ei ddirprwyo i grŵp bach o aelodau'r Bwrdd. Oherwydd natur arwyddocaol yr ymgynghoriad, roedd yr ymateb yn dod o dan awdurdod y Bwrdd. Cytunodd y Bwrdd i ddirprwyo'r ymateb i'r ymgynghoriad i'r Cadeirydd, y Prif Swyddog Gweithredol, Cadeirydd y Pwyllgor Rheoleiddio a Chadeirydd ARAC.
- 14.5 Diolchodd y Cadeirydd i bawb am ddod ac am gyfrannu at y cyfarfod.

Daeth y cyfarfod i ben am 16.10.

Cynhaliwyd cyfarfod caeedig o'r Bwrdd wedyn.

Diwedd